



“ FANKALAZANA MANETRIKETRIKA AN'I MASINA MARIA VIRJINY NOTORONTORONINA TSY AZON-KELOKA ”.

Ry Kristianina havana, raha ny marina dia omaly alahady 08 desambra no fankalazana manetriketrika ny Masina Maria notorontorinona tsy azon-keloka, mpiaro voalohany an'i Madagasikara kanefa izy latsaka ao anatin'ny Avent Alahady faharoa ka androany

Vakiteny I : Jen. 3, 9-15. 20

Salamo : Sal. 97

Vakiteny II : Efez. 1, 3-6. 11-12

Evanjely : Lk. 1, 26-38

Alatsinainy ny Eglizy no mankalaza ny fety 08 desambra indrindra isika eto Madagasikara ka ankafaliana sy ankaravoana ny hitondrana ny firariantsoa, ny fiarahabana ho antsika tsirairay satria mpiaro antsika i Masina Maria virjiny,

Immaculée Conception izay tamin'ny fotoan'andro efa ela no nofidiny ireo eveka ho mpiaro ny tanindrazantsika. Tsara raha miara misaotra an'Andriamanitra isika satria ny tenin'Andriamanitra arosen'ny Eglizy amin'izao fotoana izao dia mampitodika antsika amin'ny batemy izay noraisintsika, vita batemy aho ka hirahina.

Izany no lohahevitra amin'izao taonan'ny misiona izao ary anatin'izany no ankalazantsika ny faha 100 taona ny FET sy ny kongresy eokaristika ka nandraisantsika ny lohahevitra hoe “Ny teny tonga nofo, ny nofo tonga mofo, mofo tonga aina”.

Amin'izao fiomanantsika akaiky ny noely izao no ankalazantsika ny fetin'i Masina Maria virjiny nitorontorinona tsy azon-keloka ka mampandinika ny batemy noraisintsika.

Ampiatsihaivin'ny vakiteny faharoa ny taratasy Md Paoly ho any efezianina « *Nifidy antsika tao aminy mba ho masina tsy manantsikny ao aminy isika* » izany no dikany batemy, marina fa olombelona isika mandia tany ka mety lavo ary miloloha lanitra mety lena fa noho ny traikefan'i Md Paoly sy ny finoana nananan'i Md Paoly dia nanamafy izy

fa raha vita batemy isika dia zanak'Andriamanitra, tsy noho ny fahamendrentsika fa noho ny fanomezan'Andriamanitra. Izy no nifidy antsika mba ho masina tsy manantsiny isika eo anatrehany ary izany dia talohany naharian'izao tontolo izao. Izany no mampitodika antsika amin'i Masina Maria satria izy no voalom-bokatra, renin'Andriamanitra izy, izy no prototype, izy no kolokoloin'Andriamanitra tsy noho ny fahamendreny fa noho ny fahasoavana entin'i Kristy ka izy no volavolain'Andriamanitra ho modely ho antsika amin'ny tsy maha manantsiny azy. Izy no fonenan'ny zanak'Andriamanitra ka noho izany dia isika ihany koa no fonenan'i Kristy, izany ny dikany fiomanantsika amin'ny noely izao sy ny famenoana ny siny enina hahatonga antsika tokoa ho volavolain'Andriamanitra na dia tsy lavorary tahaka an'i Masina Maria fa miombona amin'Andriamanitra.

Izany ny fiainantsika raha mandray an'i Kristy isika dia onenan'Andriamanitra dia miova ny fiainantsika. i Masina Maria no modely sy famantarana ho antsika. Na dia eo ny fahotana tamin'ny fototra ao amintsika ao dia efa miandrindra ny famonjena ao amin'i Kristy isika.

Voalaza amin'ny vakiteny voalohany ao amin'ny bokin'i Jenezy, nalain'ny demony fanahy ireo olombelona voalohany, lavo tamin'ny fahotana, ary azo lazaina fa tsy maintsy etrehintsika koa amin'ity fiainantsika ity, Ady sady Dia ny fiainana. « *Ary hampifandrafesiko ianao sy ny vehivavy, ny taranakao sy ny taranany: izy hanorotoro ny lohanao, ianao kosa hanorotoro ny ombalahin-tongony.* »

Ady amin'ny fahotana no tsy maintsy hatrehintsika noho ny fahotana tamin'ny fototra ka i Masina Maria no volavolain'Andriamaitra hiatrika an'izany ary i Jesoa zanak'Andriamanitra no zanak'i Masina Maria, izy izay tsy nanota nanaiky ho fahotana mba hanitsakitsaka ny fahotana ka raha miaraka aminy isika dia afaka hanitsakitsaka ny ratsy sy ny demony.

Rehefa avy ny fotoana dia haniraka an'I Jesoa Andriamanitra hoy I Md Paoly amin'ny vakiteny faharoa, « *Hisaorana anie Andriamanitra Rain'i Jesoa Kristy Tompontosika, izay nitso-drano antsika tao amin'i Kristy, amin'ny tsodrano rehetra ara-panahy any andanitra, sy nifidy antsika tao aminy talohan'ny nahariana izao tontolo izao, mba ho masina sy tsy manan-tsiny eo anatrehany isika, ary nanendry antsika rahateo tamimpitiavana araka ny sitraky ny fony, mba ho zanaka hatsangany amin'ny alalan'i Jesoa Kristy isika*»

Raha mihaino sy miaina ny tenin'Andriamanitra isika dia ao amintsika i Ilesoa ka afaka handova tokoa isika ho taranaka mpanorina, fanorenana vaovao, fahariana vaovao no ambaran'i Masina Maria notorontoronina tsy azon-keloka.

Izany koa no miandry antsika, i Masina Maria no nisantatra an'izany fa isika rehetra dia handray fahasoavana lehibe dia tsy inona fa ny ambaran'ny anjely ao amin'ny evanjely « *Mifalia ry feno hasoavana, ny Tompo ao aminao* » isika ihany koa amin'ny alalan'ny batemy dia mandray an'izany na dia tsy tahaka an'i Masina Maria noho ny fahasoavany manokana fa afaka miroso amin'izany kosa isika amin'ny alalan'ny fanoloran-tenantsika izay ataontsika amin'ny fankalazana manokana ny 08 desambra, amin'izao taona masina

ny misiona izao, hiaraka isika hanokan-tena tokoa amin'i Masina Maria, miaraka aminy hanao eny fa izany eny izany no nampiova ny fianantsika olombelona ka zary fiainana misy an'Andriamanitra ka hiaraka amin'i Masina Maria isika hanao ny eny hanova ny fiainantsika. Enga anie i Masina Maria hivavaka ho antsika, hitalaho ho antsika mandrakariva izy mba ho taranaka mpanorina tokoa isika.

Vita batemy isika ka ho tahaka an'i Masina Maria nitondra an'i Jesoa eo amin'ny mpiara-belona. Izany no tena fatom-pampianarana amin'izao fankalazana ny 08 desambra izao, tsy fahatsiarovana fotsiny fa maniraka antsika hitondra an'i Jesoa, tsy hibanjina fotsiny isika amin'ny fankalazana ataontsika fa haneho izany amin'ny fiainantsika izany hoe ny fandraisantsika an'i Jesoa tahaka ny nataony ka hitondra an'i Jesoa eo amin'ny mpiara-belona, izany no maha misionera antsika, vita batemy aho ka hirahina, EOY manorina ETA ka zary taranaka mpanorina, izany tokoa i Masina Maria ankalazaintsika androany.

Ry Masina Maria reninay ô, mivavaha ho anay mba hahatonga anay ho tempolin'Andriamanitra, ho fonenan'andriamanitra, mahatoky ny fiarovanao izahay, mahatoky fa hiaraka handresy aminao, miaraka amin'i Jesoa ka hahatonga anay koa ho famantaram-pamonjena amin'ireo manodidina anay, mihanta aminao izahay mba harovy amin'ny fahotana sy ny haratsiana rehetra ny fanahy am-batanay mba hadio sy ho mendrika an'i Jesoa zanakao. Amen

Mompera Benjamin Ramaroson Arseveka